

心之巧詐無甚於此時未知何以革此弊也又不可任其如彼而置之也當更省念族親問安前已禁之矣今後雖切親一切勿為使無雜逕○日暈○丁卯日暈兩珥○戊辰南方有氣如火○已巳傳于政院曰千秋使尹思翼先來通事入來中原所聞所見詳悉問之書啓雖有誤聞亦無罪責政院以通事言書啓曰九月二十七日皇帝幸于天壽山晦日回還以奏請事告于禮部尚書答曰此國之大事當斟酌為之本文則不可全改當依題本改註云龔薛華天使各送下程于三使奏請冬龔薛兩度來見龔天使言于禮部主客郎中許礪曰朝鮮人不可以常例待之亦甚淨潔之人館所不可污穢以處之親往修掃可也許礪親來見三使修掃館所以處之皇帝有詔書曰今年寢食不安不能親行祀天祭冬至賀禮及翌日長時節拜禮亦皆停之文武百官但會午門外而出千秋節日我國最先到雖海內兩廣布政司亦皆未及○諫院啓曰凡在侍從之列者不擬雜職其來已久所以重其任也安珰以副提學特授全州府尹